

D^a ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O DÍA 26 DE AGOSTO DE 2010. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 26 DE AGOSTO DE 2010.-

No Salón de Sesiões da Casa do Concello de Ames, ás vinte horas e trinta minutos (20.30) do xoves 26 de agosto de 2010, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Carlos Antonio Fernández Castro**, e coa asistencia das/os señoras/es concelleiras/os seguintes:

Grupo municipal socialista	Grupo municipal Popular	Grupo municipal do BNG
Patricia Conde Lois Carmen Fraga Crespo José Manuel Miñones Conde Gustavo Nieto Santiago Úrsula Seijas Seoane José Varela Abeledo Francisco Villaverde Marcos	Santiago V. Amor Barreiro M ^a Dolores Fernández Álvarez Emilio Martínez Carballeira Bernardo Moar Míguez Alfonso Rey López Ana Ruso Valiña	Xosé M. Fernández López David Santomil Mosquera Vitor Vicente Díaz Mercedes Vidal Baamonde

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación dona Rosa-Ana Prada Queipo.

Non asisten, pero xustifican a súa ausencia, a concelleira do grupo municipal socialista dona **Isabel González Cancela**, o concelleiro do grupo municipal popular don **Ramón García Argibay** e a concelleira do grupo municipal do BNG dona **Olalla Alvite del Río**.

A) PARA DAR CONTA:

Punto Primeiro.- Dar conta dos decretos ditados pola Alcaldía dende a última sesión plenaria ordinaria.

O señor alcalde informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Informa o señor alcalde que dende o decreto de convocatoria da anterior sesión plenaria ordinaria ditáronse un total de 129 decretos, dende o nº 816/2010, ao nº 945/2010.

B) PARA DELIBERACIÓN E ACORDO:

Punto Segundo.- Fixación dos festivos locais para o ano 2011.

O señor alcalde don **Carlos Antonio Fernández Castro** outorga a palabra ao voceiro do grupo municipal socialista don **Francisco Villaverde Marcos**, que informa substancialmente que aos efectos de confeccionar o calendario laboral para o ano 2011 e fixadas xa as festas estatais e autonómicas, corresponde ao pleno facelo cos dous festivos locais, traendo o grupo de goberno unha proposta que se basea na

tradición do concello de Ames de fixar como festivos locais o día da Ascensión e o día de San Xoán, que o vindeiro ano recaerán respectivamente nos días 2 e 24 de xuño.

Rematadas as intervencións, o Pleno da corporación por unanimidade dos membros presentes da corporación municipal adopta os seguintes acordos:

Primeiro.- Fixar como festivos locais para o ano 2011 os días:

-2 de xuño (día da Ascensión)

-24 de xuño (San Xoán).

Segundo.- Facultar ao señor alcalde-presidente para cantas actuacións de trámite sexan precisas para a mellor execución do acordado.

Punto Terceiro.- Convenio subvencionador entre o Concello de Ames e a Asociación de Comerciantes de Bertamiráns para a celebración da “VI Expoliquidación Val da Maía”.

O señor alcalde **don Carlos Antonio Fernández Castro** outorga a palabra á concelleira de Promoción Económica, Emprego, Turismo e Medio Ambiente, dona **Úrsula Seijas Seoane**, que di substancialmente que tal e como se explicou na comisión informativa este convenio subvencionador para a celebración da Expoliquidación, víñase aprobando en todas as súas edicións anteriores por acordo da Xunta de Goberno Local, e este ano, xa na súa VI edición, tráese a pleno debido a que a contía económica cambiou de capítulo, pasando de incluírse no capítulo IV, onde figuran todas as axudas nominativas e diferentes convenios con entidades e colectivos deste concello, a facelo no capítulo II, onde figuran os gastos correntes, correspondéndolle así o pleno adoptar o acordo expreso de concesión. Este cambio de capítulo é debido a que non existe a certeza absoluta de que todos os anos se vaia a celebrar, nin este evento nin outros, co que se pretende así contar coa liberdade suficiente á hora de apoiar ao comercio.

O obxectivo non é outro que o desenvolvemento económico e social a través dunha actividade que nos últimos 5 anos ven contando cun importante éxito de vendas e asistencia de público, pois é unha boa combinación de ocio e compras, xa que ademais de poder atopar unha grande variedade de produtos de calidade e a un moi bo prezo pódense gozar doutros servizos que garanten un día mais que agradable: os inchables de balde ou a gardaría gratuíta, obradoiros de manualidades e outras actividades de lecer, a cafetería instalada no interior do pavillón ou a polbaría do exterior.

Consolidado pois este evento, o que se pretende é continuar coa colaboración que dende o concello se viña ofrecendo. Esta colaboración estipulada no convenio concrétase nas seguintes medidas: a concesión dunha achega económica de 15.000 € equivalente ó 66,36 € do gasto estimado declarado pola asociación, a cesión gratuíta do pavillón municipal de Bertamiráns desde o día 1 ata o 5 de setembro, a posta a disposición da organización de persoal da brigada de obras e do persoal da concellaría que se encarga de colaborar na organización e participar no desenvolvemento do evento, a policía local establece un dispositivo especial e o concello colabora contribuíndo á maior difusión posible do evento a través da Web municipal e de Ames Radio.

Remata dicindo que o expediente, conta co informe favorable de intervención, e pide a aprobación do convenio para seguir así contribuíndo á dinamización, impulso e fortalecemento do tecido empresarial e comercial.

O señor alcalde **don Carlos Antonio Fernández Castro** abre unha primeira quenda de intervencións outorgando a palabra ao voceiro do grupo municipal do BNG don **Xosé Manuel Fernández López** para anunciar o voto afirmativo do seu grupo

municipal e dicir que o BNG sempre apoiará estas iniciativas de colaboración co tecido empresarial.

Intervén o concelleiro do grupo municipal popular don **Bernardo Moar Míguez** que substancialmente indica que dende o seu grupo municipal tamén van apoiar este convenio, pois pensan que o comercio é un sector moi importante sobre todo nos núcleos do Milladoiro e Bertamiráns, e o éxito do evento conveniado é coñecido por anteriores edicións. Opina que calquera axuda que se preste ao pequeno comercio dende o concello será ben acollida, especialmente nestes anos de crise económica, non obstante quere criticar o retraso da convocatoria de subvencións ao comercio do ano 2009, que chega agora, a finais de agosto.

Intervén a concelleira de Promoción Económica, Emprego, Turismo e Medio Ambiente, dona **Úrsula Seijas Seoane** para indicar substancialmente que con respecto á subvención de comercio a boa noticia é que saíu por decreto da Alcaldía o 19 de agosto, cun importe maior que o que viña sendo habitual, 42.000 euros, e que vai haber medidas que actuarán de mellora, sendo compartidos algúns cambios coas asociacións. Debido á non convocatoria no pasado ano por razóns de axuste económico este ano a subvención é de 7.000 euros mais, que permitirá subvencionar iniciativas comerciais e empresariais desenvolvidas durante o ano 2010 e tamén durante o ano 2009. A subvención estaba preparada dende hai un tempo, pero a piques de entrarse en período vacacional, se fixo unha rolda de consultas ás asociacións e se concluíu que era mellor facelo de cara a setembro.

O señor alcalde **don Carlos Antonio Fernández Castro** abre unha segunda quenda de intervencións outorgando a palabra ao concelleiro do grupo municipal popular don **Bernardo Moar Míguez** que di substancialmente que con respecto á subvención ao comercio durante os últimos anos se daba unha cantidade para as tres asociacións de algo mais de 35.000 euros anuais, e este ano se fala de 42.000 para os dous exercicios 2009 e 2010, o que indica que non medrou senón todo o contrario.

Intervén a concelleira de Promoción Económica, Emprego, Turismo e Medio Ambiente, dona **Úrsula Seijas Seoane**, que contesta ao señor Moar dicindo que dende a concellaría se entende que as melloras van compensar, pois hai un importante cambio que lle pode adiantar, sendo este que aparte das tres liñas básicas agora se van poder subvencionar os gastos de persoal, estando a subvención, en xeral, moi mellorada. Remata dicindo que ela mesma foi chamando a todos os presidentes das asociacións para telos informados e volverá facelo cando sexa publicada a subvención no BOP.

Rematadas as intervencións o pleno da corporación por unanimidade dos membros presentes da corporación municipal adopta os seguintes acordos:

Primeiro.- Prestar aprobación ao Convenio subvencionador entre o Concello de Ames e a Asociación de Comerciantes de Bertamiráns para a celebración da “VI Expoliquidación Val da Maía”.

Segundo.- Prestar aprobación á concesión dunha subvención nominativa á Asociación de Comerciantes de Bertamiráns para o desenvolvemento da “VI Expoliquidación Val da Maía” por importe máximo de 15.000 euros, autorizándose o gasto con cargo á partida de 241.489,24 euros do vixente orzamento municipal 2010.

Terceiro.- Facultar ao señor alcalde presidente Carlos Antonio Fernández Castro para cantas actuacións de trámite sexan precisas para a mellor execución do acordado.

Punto Cuarto.- Adxudicación dunha operación de endebedamento a longo prazo para o financiamento das actuacións de investimento previstas nos capítulos VI e VII do orzamento de gastos para o ano 2010.

Intervén a concelleira de Economía e Facenda dona **Patricia Conde Lois**, que introduce o asunto dicindo substancialmente que se iniciou proceso de contratación da operación de endebedamento por importe de 4.411.572,63 euros, coa aprobación das bases no pleno de 28 de xuño. Se presentou unha oferta no rexistro xeral do concello, e dado que esta contiña unha proposta parcial do 50% da operación inicial, se emitiu un informe conxunto de secretaría xeral, tesouraría e intervención, que informou favorablemente dar continuidade ao procedemento reabrindo un novo proceso de invitacións a entidades bancarias, co fin de garantir os principios de publicidade e concorrência. Rematado o prazo o día 7 de agosto seguía estando enriba da mesa a única oferta presentada inicialmente e se propuxo someter á comisión informativa de Economía e Facenda a adxudicación do contrato a esta entidade. Reunida a comisión informativa extraordinaria de Economía e Facenda o 12 de agosto, a adxudicación se ditaminou favorablemente, polo cal se trae hoxe a aprobación plenaria.

O señor alcalde **don Carlos Antonio Fernández Castro** abre unha primeira quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, o cal indica substancialmente que o BNG vai apoiar esta proposta que, en definitiva, non é mais que o desenvolvemento do orzamento, lembrando que para a financiamento da maior parte dos investimentos é necesario este 50% e tamén o outro 50% restante, e, de non subscribir esta operación, quedarían sen financiamento unha parte importante das obras. O grupo municipal do BNG, en coherencia coa postura mantida na aprobación dos orzamentos, ten que apoiar este asunto, pero preocúpalle a falta de interese das entidades financeiras para traballar co concello de Ames, lembrando que só se presentou unha entidade na última operación de crédito tramitada. Neste caso se presentou tamén só unha e fixo a oferta polo 50% do importe inicial, polo que pensa que a parte da crise xeral, parece que algo non ven claro os bancos no concello de Ames e quizá haberá que pensar mellor o financiamento estrutural do concello. Os concellos en xeral teñen problemas de financiamento, pero a Ames se lle supón unha capacidade económica. Considera moi elevado o interese desta operación, sobre todo comparado con outras operacións recentes. Remata dicindo que o coherente tivera sido, por tacto e prudencia, esperar a que as bases foran aprobadas en pleno para darllas a coñecer ás entidades financeiras, e non facilitarlles un borrador de bases pendentes de aprobación plenaria, como se comproba na documentación que se fixo.

Intervén o voceiro do grupo municipal popular don **Santiago Amor Barreiro** para dicir substancialmente que finalmente se debate a adxudicación dunha proposta pola metade do crédito inicial solicitado, e tendo en conta que nos últimos meses o euribor está subindo, o diferencial de 2,4 fai que o interese que se terá que pagar sexa bastante alto. A iso se suma que no primeiro momento se pretendía que a carencia fora total durante os 2 primeiros anos e ao final a carencia é parcial, se van pagar intereses e non amortizar capital. Se remitiron 11 ofertas a entidades do concello e 1 a outra de Santiago de Compostela, e ao final só hai unha entidade que fía os cartos ao concello de Ames, e só pola metade. Opina que a impresión é de desconfianza por parte das entidades bancarias porque non se paga aos provedores ou se fai tarde existindo unha xestión económica deficitaria. Se interesa pola prioridade á hora de realizar as inversións que figuran no orzamento, ao dispoñer só da metade do crédito. Manifesta que o seu grupo municipal non quere crispas nin alarmar pero a situación actual do concello é crítica e as probas son que os bancos non acceden a prestar cartos ao concello non só pola crise xeral, senón porque hai unha mala xestión dos recursos.

Remata dicindo que prevé unha situación vindeira aínda mais complicada que a actual, pois a entidade á que se lle pretende adxudicar, indica que o outro 50% dependerá do resultado do exercicio 2009, e se pregunta cal será este. As

transferencias estatais van baixar para o próximo ano, e o concello de Ames vai ter que devolver os adiantos, tampouco se van poder solicitar créditos, e as únicas partidas que van poder supor ingresos serán as achegadas da Xunta de Galicia.

Intervén a concelleira de Economía e Facenda dona **Patricia Conde Lois**, que substancialmente di que agradecería ao grupo municipal popular que se cinga ao asunto que se está a debater, pois sempre aproveitan para falar das débedas pendentes, pagos a provedores, etc., e o tema que se está tratando é a adxudicación dun préstamo a longo prazo para financiar investimentos. Para o goberno municipal é un éxito o feito de poder ter unha operación destas características. Lembra que cando chegou ao concello e se licitou a operación de tesouraría en época económica álxida só se presentaron tres entidades, e que hoxe, na situación económica actual, se presente unha, é un éxito rotundo. Facer acusacións como que hai unha situación crítica demostra que non teñen nin idea do que é un concello, e dicir que o alcalde non é de fiar ou que o concello ten mala fama son acusacións sen fundamento, pois un concello pode acceder a un crédito se cumpre os requisitos legais, e Ames os cumpre segundo figura no expediente. Segundo di a oposición, as entidades bancarias non se fían do concello, e sen embargo no que vai de ano foron subscritas con tres entidades distintas operacións por un total de catro millóns e medio de euros. As entidades financeiras, en xeral, teñen problemas en canto a liquidez para poder presentar ofertas, pero iso ocorre co concello de Ames e co resto dos concellos galegos e mesmo españois, porque é consecuencia da crise económica global.

Pregunta, dirixíndose aos membros da oposición, se son coñecedores do número de empresas que quizerían traballar co concello de Ames e non o poden facer porque os bancos non lles conceden avais, dicíndolles que hai que ter sensibilidade e non alarmar, haberá que aplaudir a oferta presentada coa consecuencia de poder realizar os investimentos previstos, dirixidos nesta primeira fase a subvencións, proxectos importantes coma a Travesía do Porto, obras incluídas dentro de plans provinciais coma o POS, e diferentes proxectos que o goberno municipal entende como prioritarios considerando o acordo co BNG no seu día. Dilles aos membros do grupo municipal popular que o que pretenden é tapar o logro conseguido de 2.205.786,32 euros para o concello de Ames, sendo certo que falan de conceder o resto a tenor da análise da liquidación do exercicio 2009. En relación aos intereses di que son proporcionais á situación económica actual, e que o concello de Ames non ten para nada unha situación crítica. Remata preguntando ao grupo municipal popular se en realidade quere que se adxudique o préstamo ou non, pois na crítica que facían no inicio do expediente da operación aducían que era un préstamo moi elevado e agora alarman nos medios de comunicación dicindo que só se concede a metade.

O señor alcalde don **Carlos Antonio Fernández Castro** abre unha segunda quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, que substancialmente di que quere facer unhas matizacións, deixando claro que reitera que o seu grupo municipal vai apoiar o asunto pois a cantidade ofertada vai permitir financiar toda unha serie de obras que o BNG axudou a conseguir, e sen o crédito non se poderían executar. Matiza que é evidente que o concello cumpre os requisitos sen os cales non se podería acceder ao crédito, polo que non lle parece un argumento válido. Finalmente, en canto ao diferencial, hai que recoñecer que é alto, independentemente de que a situación económica actual sexa a que é.

Intervén o voceiro do grupo municipal popular don **Santiago Amor Barreiro** para dicir substancialmente que parece que a concelleira de Economía e Facenda e eles falan de concellos e situacións diferentes, pois a realidade do concello a coñecen todos, empresas e provedores incluídos. Que van confiar en que se conceda o 50% restante, e non dixo que o concello non cumprixe os requisitos legais. Remata dicindo

que o seu grupo municipal non sabe as razóns de que non se presentaran mais entidades pero se a operación se solicitara no segundo semestre do ano habería que ter xa preparado o avance da liquidación do ano 2009, preguntándose se o feito de cursalo antes non foi para que non houbese problemas nese sentido.

Intervén a concelleira de Economía e Facenda dona **Patricia Conde Lois** para dicir substancialmente que a economía nun concello non se move pola intuición senón polo cumprimento dos requisitos. O goberno é humilde na cuestión económica e está a dar pasos, pero co que non está de acordo é con que se poñen peros e se tenten afeiar os pequenos avances, que, en definitiva, redundan en beneficio dos cidadáns. Cando a oposición fala de que o goberno facilitou o borrador das bases da concertación de préstamo antes de ser aprobadas en pleno, se fixo para avanzar na información, xa que as entidades bancarias teñen que facer unha longa tramitación para poder presentarse ás ofertas.

Toma a palabra o señor alcalde don **Carlos Antonio Fernández Castro** para dicir substancialmente que como alcalde lle corresponde engadir algunha cuestión respecto de certas cousas que se dixeron. Gobernar un concello na situación actual é sumamente difícil, non hai ningunha alegría para ningún dos 315 concellos galegos, moitos teñen dificultades en poder subscribir a mais mínima operación de préstamo, por tanto valora moi positivamente o feito de que unha entidade bancaria se presentara e o fixera con unha contía de dous millóns e medio de euros, cantidade importantísima. Como dixo a concelleira, no que vai de ano saíron adiante unha serie de operacións de préstamo por cantidades moi importantes (ás cales alude pormenorizadamente) e con esta operación que hoxe se debate comparece unha entidade e lle di ao concello que a cantidade inicial é moitísimo diñeiro, pero subscriben o 50%, e pasado un tempo, coa liquidación do ano 2009, considerarán a segunda parte da operación. Isto, lonxe de ser un fracaso como algúns pretenden presentalo, é un éxito, pois o normal tivera sido que contestaran que pola cantidade total de 4.411.572,63 euros non lles conviña neste momento. Cando se anunciou esta operación moitos alcaldes de toda Galicia lle preguntaron se cría que ía ter licitadores neste momento económico. Continúa dicindo que todo depende de como se queira mirar, en época de bonanza económica, hai apenas tres anos, cando o concello de Ames sacou unha operación de préstamo de mais dun millón de euros, só se presentou unha entidade, Caixagalicia, e mesmo lle diría ao PP que estaría disposto a desempolvar os expedientes de créditos que o concello segue a pagar hoxe e foron subscritos polo goberno popular anterior, e verían que seguramente só se presentou unha entidade bancaria, polo tanto de algo que xa é tradicional e ocorre en moitas entidades locais, non se pode facer leña.

Manifesta que o feito de invitar ás 11 entidades radicadas en Ames, costume que probablemente algún día, cando o concello medre mais, haberá que cambiar, naceu historicamente cando había *monocultivo* financeiro con Caixagalicia, e sempre se tivo a cortesía de invitar a todas, igual que sempre houbo o criterio, que se mantén, de abrir conta do concello cando unha entidade abría as súas oficinas en Ames, por darlles a benvinda, sendo certo que o 70-80% do movemento se manexa con Caixagalicia por tradición. Tamén hai entidades financeiras que cando son invitadas a unha licitación chaman por teléfono e din que o seu tipo de negocio non encaixa co plantexado polo concello, lembrando que no goberno de coalición ocorreu iso cunha entidade financeira radicada no Milladoiro. Cando a concelleira insistiu en que o concello cumpre todos os requisitos legais foi porque hai que facer evidente o que é normal, simplemente por contrarrestar acusacións infundadas e perigosas, pois coa situación que describiu a oposición da a sensación de que Ames é un concello caótico e que non cumpre os parámetros legais.

Todas estas cuestións hai que situalas con humildade e modestia na situación actual, o goberno é quen mellor sabe que o concello deixou de ingresar 3,5 millóns de euros

anuais, e se se tiveran recortado servizos na mesma proporción seguramente hoxe estarían sendo criticados por elo. Se busca a forma de saír adiante nobremente e dentro da legalidade. É certo que axudou moito o Plan E cando deu ao concello a fondo perdido algo mais de sete millóns de euros en dous anos, que permitiron salvar os investimentos, pero non o gasto corrente. Todos os alcaldes de Galicia saben isto, como tamén saben que chegar a un pleno cunha concesión por unha entidade como é o Banco de Crédito Local, que é o mais especializado nas administracións locais, cunha contía de 2,5 millóns de euros non é ningún fracaso senón un éxito, e non para vanagloria do goberno municipal, senón para vanagloria do concello de Ames.

Remata dicindo que este concello sae adiante con moitas dificultades e moitos problemas cada día, con moitas estreiteces, pero que está entre os 25 concellos mais solventes de Galicia sen ningún xénero de dúbidas, así que pide que non fagan dano ao concello, que critiquen ao goberno na súa xestión económica ou administrativa, pero que non fagan dano á institución, porque, entre outras cousas, coa alternancia que se produce na democracia, dentro duns meses outros poden estar gobernando e non lles vai gustar herdar o que antes sementaron.

Rematadas as intervencións o pleno da corporación por maioría absoluta do número legal de membros da corporación municipal, cos votos a favor dos 8 membros presentes do grupo municipal socialista e dos 4 membros presentes do grupo municipal do BNG e a abstención dos 6 membros presentes do grupo municipal popular, adopta os seguintes acordos:

Primeiro.- Adxudicar a operación de endebedamento para o financiamento das actuacións de investimento previstas nos capítulos VI e VII do orzamento de gastos para o ano 2010, por un importe de 2.205.786,32 euros, ao Banco Bilbao Vizcaya Argentaria S.A., con CIF A-48265169, de acordo co tipo e coas condicións recollidas nas bases e na oferta presentada pola licitadora, que se resumen de seguido:

Proxecto a financiar	Financiamento dos investimentos do ano 2010
Sistema amortización	Cotas constantes ou sistema francés
Importe inicial da operación	2.205.786,32 euros
Tipo de xuro	Variable: EURIBOR (360) + 2,3 p.p.
Frecuencia pago principal e xuros	Trimestral
Nº pagos	60
Duración	15 anos (2 de carencia)

Segundo.- Facultar expresamente ao Alcalde-Presidente, Carlos Antonio Fernández Castro, para cantas actuacións de trámite sexan precisas para a mellor execución do acordado.

Punto Quinto.- Aprobación da Conta Xeral 2008.

Intervén a concelleira de Economía e Facenda dona **Patricia Conde Lois**, que introduce o asunto dicindo substancialmente que se trae a aprobación do pleno a conta xeral do exercicio 2008 logo dun longo proceso iniciado o 24 de maio a través do decreto de Alcaldía que aprobou a liquidación do orzamento. O resultado orzamentario axustado é de 830.346,90 euros, cun remanente de tesouraría para gastos xerais de menos 428.871,99 euros. Cumpridos todos os trámites legais e administrativos corresponde hoxe ao pleno a aprobación da conta xeral para a súa remisión aos órganos de control, Consello de Contas e Tribunal de Contas. É de todos coñecido o retraso existente na elaboración das contas xerais e todas as

medidas que se levaron a cabo para dar cumprimento ás obrigas en tempo e forma, sendo o de hoxe un paso mais no traballo de rendición de contas anuais. O departamento de intervención xa está a traballar na liquidación da conta do exercicio 2009, a última que hai que presentar este ano, e felicita aos traballadores dos servizos económicos polo labor feito.

O señor alcalde don **Carlos Antonio Fernández Castro** abre unha primeira quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, que substancialmente di que este asunto, como en anos anteriores, se presenta a aprobación plenaria con retraso, e como reflicte o informe de intervención municipal se están a incumprir os prazos. Hai que recoñecer que esta conta ven a pleno con menor retraso que as anteriores, semella que se está facendo un esforzo e agarda que a do 2009 sexa presentada o antes posible. Esta conta xeral se corresponde co primeiro orzamento que é responsabilidade exclusiva do actual goberno municipal, e reflicte a súa xestión económica e xa non poden achacar responsabilidades aos socios de goberno. Non vai desmiuzar todos os parámetros da conta pero quere incidir no nivel de execución dos orzamentos, posto que no seu día se venderon como orzamentos históricos e espectaculares. O goberno municipal prevía no ano 2008 uns ingresos de mais de 37 millóns de euros e a realidade é que ingresaron aproximadamente 21,5 millóns de euros, o 58% do previsto. O 42% que se deixou de ingresar se corresponde con 16 millóns de euros. Se deixou de ingresar en impostos directos, indirectos, taxas, e a cantidade mais importante en venda de patrimonio, case 11,5 millóns de euros, e tamén en transferencias de capital doutras administracións. No capítulo de gastos non se executou o 45% do previsto. Os números son clarificadores e evidencian a capacidade de xestión do goberno.

En canto á conta xeral seguen aparecendo numerosos informes de intervención con advertencia de legalidade, mesmo algún que xa aparecía no 2007. Aínda que recoñece unha evolución positiva quedan asuntos por resolver, consultorías técnicas, asesorías xurídicas, etc., así como clarexar a situación financeira da empresa que xestiona auga e saneamento. O lema “e nós mais”, que o goberno utilizou dende o principio da lexislatura, quedouse en mais orzamento sen gastar e mais cartos sen ingresar.

Intervén o voceiro do grupo municipal popular don **Santiago Amor Barreiro** para dicir substancialmente que este asunto se trae a aprobación con case un ano de retraso e lembra os escritos remitidos polo Tribunal de Contas e o Consello de Contas ao concello para requirilo. Indica que o que o seu grupo municipal dixo, o tempo lle deu a razón, pois non se cumpriu co proxecto de orzamento cualificado polo goberno no seu día como o mais alto da historia de Ames.

Manifesta que quere referirse a tres asuntos. En primeiro lugar o volume excesivo do gasto corrente, que pasou de sete millóns no ano 2007 a dez millóns no ano 2008, en ambos casos a execución dos capítulos de persoal e gasto corrente chegou case ao límite, o cal quere dicir que se gastou case todo o orzamentado neses dous apartados. A isto hai que sumar os recoñecementos extraxudiciais do 2009 por gasto corrente do 2008, que demostra o advertido polo PP en moitas ocasións, que o gasto corrente é excesivo e segue crescendo, o cal choca coa capacidade do concello para obter ingresos, tal e como amosa o remanente de tesouraría negativo. A consecuencia é que os provedores non cobran en moitos meses e se incumpren os prazos legais. Está de acordo co voceiro do BNG en que ao mellor hai que replantexarse o financiamento municipal. Di que pode entender que pequenos concellos que xeran poucos recursos e teñen que prestar servizos obrigatorios estean ao límite, pero o caso de Ames é diferente, sendo un concello de perfil urbano e cunha situación de ingresos envexable. Alude en segundo lugar a titulares de prensa referidos ao orzamento do goberno no ano 2008 relativos a que o 50% da contía do

orçamento sería empregado en investimentos reais, o goberno falaba de que o 2008 ía ser o ano do Milladoiro e os investimentos quedaron nun 17%. En terceiro lugar se pregunta por obras incluídas nese orzamento enumerando algunha delas, como adquisición dun local para centro de día, peche da pista de Barouta, compra de terreos para a ampliación da praia fluvial de Tapia, etc., e di que algunha tivo a sorte de ser incluída no Fondo Estatal de Investimento Local do ano 2009, que veu salvar obras do 2008, pero outras moitas non se executaron. Refírese ao que entende como numerosas irregularidades na execución do gasto e di que os informes de intervención falan de servizos e asistencia técnicas que teñen natureza laboral e non hai nin contratos administrativos nin laborais, xa houbo con anterioridade informes parecidos, e eses traballadores que facturan mensualmente seguen sen regularizar a súa relación laboral co concello. Remata aludindo a outros informes de intervención relativos a que hai que regularizar servizos habituais, así como suministros que non se sacan a licitación. Finalmente felicita aos servizos económicos polo traballo desenvolvido.

Intervén a concelleira de Economía e Facenda dona **Patricia Conde Lois**, que substancialmente indica que quere clarear en primeiro lugar que o que se somete a aprobación é a conta xeral do ano 2008, trámite administrativo necesario para ser remitida aos órganos de control externos, o sentido do voto en canto á súa aprobación non implica que os membros da corporación estean conformes ou non coa xestión habida nese exercicio. En segundo lugar quere referenciar que o 2008 foi o ano en que comezou a crise mundial, que ao concello de Ames afectou como se reflicte nos datos da conta xeral. En canto á execución dos gastos e os ingresos dependendo do grupo político se pode dar un ou outro tipo de discurso, e cinguíndose á xestión habida, a cal figura no expediente da conta xeral 2008, a execución dos gastos é boa en xeral exceptuando o capítulo VI de investimentos reais, que fai que descenda o coeficiente de execución do gasto ao 56,38%, sendo o motivo da diminución das inversións, fundamentalmente, que non se puido xestionar nin vender o patrimonio municipal de solo por causa da crise inmobiliaria, pero o goberno municipal saíu adiante buscando outras vías para executar a maior parte dos investimentos previstos. Indica que a chegada do Plan E non foi sorte, senón unha decisión política que axudou a moitos concellos de todas as cores políticas. A maioría dos investimentos foron executados e con custe 0 para o concello, á vez que se dispón de patrimonio municipal de solo por importe de 12 millóns de euros. En resumo, e dadas as circunstancias críticas dese ano, considera que se levou a cabo unha boa execución do gasto.

En canto á execución dos ingresos di que o fundamental foi que non se puido realizar a venda de patrimonio municipal de solo, así como a baixada da recadación de impostos indirectos, motivada polas circunstancias especialmente críticas dese ano.

En relación ao remanente negativo de tesouraría, é o segundo ano no que se produce. Contestando á pregunta do voceiro do grupo municipal popular, di que se examinara con mais detalle o expediente vería que figuran informes ao respecto que especifican o motivo fundamental, que é que se executaron con fondos propios gastos que estaban previstos con endebedamento.

En canto aos informes de advertencia de ilegalidade, 42 concretamente, a día de hoxe están practicamente todos resoltos e dos pendentes de resolver se prevé que 3 deles, herdados de anos atrás, roldando o mes de setembro se podan regularizar. Remata reseñando os parámetros positivos desta conta xeral 2008, a liquidación foi positiva, o que implica que houbo unha boa execución dos gastos e os ingresos, que o resultado orzamentario foi positivo en mais de 800.000 euros, se cumpriu o principio de estabilidade presupostaria e se diminuíu, como viña sendo habitual, a débeda viva e a longo prazo, xa que non se concertou ningunha operación de préstamo. Resalta novamente o esforzo feito polos servizos técnicos, en canto á rendición da conta do

ano 2009 a previsión é que no mes de outubro estea formalizada a liquidación para iniciar os trámites correspondentes.

O señor alcalde don **Carlos Antonio Fernández Castro** abre unha segunda quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, que substancialmente di que o argumento fundamental do grupo de goberno é que no ano 2008 houbo unha crise, pero que cando se aprobaron eses orzamentos xa era mediados de ano, e xa nos últimos trimestres do ano 2007 e primeiro do 2008 todos os indicadores económicos referían en negativo, pero a obsesión do goberno perdeunos, e o teñen que recoñecer. Reitera que foi un orzamento discreto, e mesmo o podería cualificar de razoable se non se tivera aquela obsesión enfermiza de vendelo como o orzamento do século, coma se non existise a crise, o que lle lembra ao señor Zapatero. Interesaba vender aquel orzamento porque era o primeiro de goberno en solitario, e a realidade foi que dos tres últimos anos o nivel de execución de gasto e ingreso é o mais baixo. Sobre o remanente de tesouraría, volve ser negativo e mostra unha tendencia que espera sexa corrixida na conta xeral do 2009, porque esa falta de liquidez é a causante de non poder afrontar determinados pagos.

Intervén o voceiro do grupo municipal popular don **Santiago Amor Barreiro** para dicir substancialmente, dirixíndose á concelleira, que naturalmente que o que se somete a aprobación é a conta xeral, pero que esta non deixa de ser un documento que reflicte a xestión económica dun goberno, e deixa moito que desexar. Está ben que recoñezan agora que un dos motivos foi a crise, pero iso xa se albiscaba, e xa se dixeran en reiteradas ocasións neste salón de plenos, pero ao goberno lle parecía que quedaba moi lonxe. En canto á dificultade en venda de patrimonio xa se advertira diso por parte do seu grupo municipal, comparando con outros concellos mais grandes que incluían menos venda de patrimonio nos seus orzamentos. Lémbra-lle que cando o goberno actual colleu o concello este tiña un remanente de tesouraría positivo e pagaba puntualmente aos provedores, e ese remanente ten decrecido ate converterse no actual. Se pregunta que se lles pode dicir agora aos veciños do Milladoiro, Bertamiráns e o rural do que pasou coas obras que figuraban no anexo de inversións do ano 2008. Reitera que o seu grupo entende que iso non é planificar nin xestionar e que o orzamento *tiña moito fume*. Insiste nas persoas que prestan servizos no concello e cobran remitindo facturas, que é moi posible que xa teñan adquirido de feito a condición de traballadores laborais indefinidos sen o mais mínimo procedemento de selección, como o asesor xurídico externo do concello, dicindo que a situación é para nota, pois hai un asesor que asesora ao concello en asuntos legais e ten un contrato vencido e ilegal, dicindo que o total facturado por esta asesoría xurídica externa ao concello dende que ven traballando con el é de 330.000 euros.

Intervén a concelleira de Economía e Facenda dona **Patricia Conde Lois**, que substancialmente di que o voceiro do grupo municipal popular insiste novamente nos mesmos aspectos, que non se vendera patrimonio municipal de solo, cominándoos a que vexan o lado positivo, como que se executaron obras sen custe ningún para o concello e mantendo o patrimonio municipal. Falan do elevado gasto corrente, e este concello aposta polo gasto social, é un concello destacado principalmente polos servizos en todos os ámbitos, diferenza do PP, que nunca o fixo, e quedan sobradas mostras. Dende o ano 2003 hai moitísimos servizos sociais aos que antes un cidadán non tiña acceso, que tamén hai que considerar a subida da poboación, non podendo compararse o gasto corrente do exercicio 2008 cos anteriores ao ano 2003. O peor é que o voceiro do grupo municipal popular alarma falando de situación crítica, e sen ir mais lonxe nos últimos dous meses se fixeron pagos por mais de dous millóns e medio de euros. Este concello non está na bancarrota e está a facer pagos, con retraso si, pero está traballando para saír adiante, por tanto dean o brazo a torcer e

apoien ao goberno nesta situación que se está a producir non só en Ames senón en moitas entidades.

Rematadas as intervencións o pleno da corporación por maioría simple, cos votos a favor dos 8 membros presentes do grupo municipal socialista e a abstención dos 6 membros presentes do grupo municipal popular e dos 4 membros presentes do grupo municipal do BNG, adopta os seguintes acordos:

Primeiro.- Prestar aprobación á Conta Xeral do concello de Ames correspondente ao exercicio 2008.

Segundo.- Facultar ao señor alcalde presidente Carlos Antonio Fernández Castro para cantas actuacións de trámite sexan precisas para a mellor execución do acordado.

Toma a palabra o señor alcalde don **Carlos Antonio Fernández Castro** para dicir substancialmente que con respecto á conta xeral quere facer uns apuntamentos. Primeiramente dicir que sempre se fala do gasto corrente, e dunha vez por todas débese definir o que hai detrás. Cando chegou á Alcaldía atopou facturas de comidas con cifras de gasto espectaculares, o cal nos últimos sete anos, con goberno de coalición ou en minoría, non se produce porque está estritamente prohibido. Detrás do gasto corrente hai un modelo sociopolítico que se veu desenvolvendo primeiramente en coalición e despois en solitario, o modelo das Escolas Infantís municipalizadas con preto de 50 traballadores aos que se aplica o convenio colectivo do concello de Ames, non o modelo anterior en mans privadas. Non se escatima mais alá do razoable nos gastos, o goberno ten deseñado un servizo de escolas infantís municipais moi valorado pola cidadanía. É un modelo de concello con rede de comedores escolares que para este ano ten xa unha previsión de case mil usuarios. Todas esas cousas custan diñeiro e naturalmente que elevan o gasto corrente. Compárense con concellos limítrofes que deciden non prestar certos servizos, sen escolas infantís propias ou sen rede de comedores escolares, evidentemente no senso económico non resiste comparación. Cada un ten que adaptarse á súa socioloxía, pero cando falan do gasto corrente transmiten a idea de que hai derroche, dispendio de fondos económicos, e a realidade é que o gasto corrente se orienta cara un modelo sociopolítico que o goberno se esforza cada día en facer mais eficiente e eficaz, tentando cada día abaratar os custes, pero de momento non é posible. Tamén falan dos gastos de persoal, e o concello ten 50 persoas traballando nas escolas infantís, que outros concellos que elixen outro modelo sociopolítico distinto non as teñen.

Remata dicindo que temos 25 policía municipais e outros concellos con poboación parecida non. Cando chegamos ao goberno municipal con 20.000 habitantes tiñamos 10 policía, non sendo posible facer as quendas nin traballar de noite. Son modelos de xestión, modelos políticos que cada un elixe, e a xente advertiu a diferenza do que pasaba antes do 2003 ao que pasou despois, de feito no 2007 a xente refrendou esta alternativa política. O día que pensen que non debe haber mais gasto corrente dese estilo volverán votar ao PP e perderán os comedores escolares, os Bos días Cole, as Tardes Divertidas, a Escola Municipal de Música, porque todo iso foi creado despois do ano 2003. Así que cando se fala de gasto corrente hai que saber onde vai o gasto corrente, dende logo non a mariscadas e botellas de cardhu, senón a un cambio sociopolítico que se implantou neste concello no ano 2003.

O señor **alcalde** outorga a palabra, por alusións, ao voceiro do grupo municipal popular don **Santiago Amor Barreiro**, que indica que o seu grupo político se sente aludido. Dirixíndose ao señor alcalde dille que a demagogia que demostrou hoxe é habitual, vostede acusa ao PP de que no caso de que gañe as eleccións vai eliminar servizos de conciliación da vida familiar e laboral e lle está metendo o medo á xente no corpo. No tema das facturas supoño que a factura da comida aludida estará

xustificada e formará parte da contabilidade, pero lle digo, señor alcalde, que na contabilidade do ano 2008 hai unha factura dun hotel de Vigo que pon servizo de marisquería, que ao mellor trabucáronse no título, por 2.994 euros... ao mellor foi un erro.

Toma a palabra o señor alcalde don **Carlos Antonio Fernández Castro** para dicir como eu me referín a unha factura dun restaurante moi coñecido, coa mesma tranquilidade e transparencia imos dicir aos 21 membros da corporación municipal e a quen o queira recibir a explicación de que ese servizo que vostede chama de marisquería, e vostede o sabe perfectamente porque está encaixado na contabilidade, é a comida dunha excursión colectiva de “Coñecendo o País” ao concello de Vigo, diferente é que o sitio onde almorzaron as persoas asistentes poña no logotipo da factura marisquería, servizo a domicilio, servizo de habitacións... etc., o que non quere dicir que se teña pagado por ese servizo. Na contabilidade está ben asentada como xantar dunha excursión colectiva, que normalmente son 300 persoas, asisten concelleiros de todos os grupos e saben perfectamente que esas excursións se anuncian publicamente e se apuntan os que queren asistir. Distinto é que catro persoas consuman unha mariscada e unha botella de cardhu. Iso demostra o grao de coñecemento que vostede ten ou o grao de mala intención na lectura da factura. O señor **Amor** responde que xa lle dixen dende o principio que podería ser un erro.

Punto Sexto.- Cesión gratuíta de parcela na localidade do Milladoiro a favor da Xunta de Galicia para edificio destinado á terceira idade.

O señor alcalde don **Carlos Antonio Fernández Castro** outorga a palabra ao voceiro do grupo municipal popular don **Santiago Amor Barreiro**, que a solicita, antes de comezar o debate, para dicir que o seu grupo quere facer a proposta de deixar este asunto sobre a mesa porque o pasado 16 de febreiro na comisión informativa de Urbanismo, Vivenda, Planificación de Infraestruturas e Obras Públicas se ditaminou o inicio de expediente para cesión gratuíta de parcela na localidade do Milladoiro a favor da Xunta de Galicia para edificio destinado á terceira idade, e outra en Bertamiráns para escola de educación infantil. No pleno do día 25 de febreiro se someteu a consideración da corporación o inicio de expediente para posta a disposición de parcela na localidade do Milladoiro a favor da Xunta de Galicia para edificio destinado á terceira idade, así como posta a disposición de parcela na localidade de Bertamiráns para escola de educación infantil. Se cambiou o asunto ditaminado na comisión informativa na convocatoria do pleno, advertencia que se fixo antes de comezar o debate plenario por parte deste voceiro, e unha vez realizada a votación sen advertir do cambio na maioría esixida para a aprobación, se aprobaron as propostas do grupo de goberno por maioría simple, polo que os grupos da oposición abandonaron o salón de sesións. Como consecuencia disto o grupo municipal popular acudiu aos tribunais do contencioso administrativo de Santiago de Compostela ao entender que foran vulnerados os dereitos fundamentais dos membros da oposición municipal, presentando a correspondente demanda. Nese momento se inicia o procedemento xudicial, que foi admitido a trámite, se deu traslado ás partes e foi informado polo fiscal, atopándose a día de hoxe pendente de ditar sentenza, sendo cuestión de días, unha vez que comece o mes de setembro. Propón esperar a sentenza e mentres que o asunto quede sobre a mesa.

Toma a palabra o señor alcalde don **Carlos Antonio Fernández Castro** para dicir que non imos votar afirmativamente a proposta de deixar sobre a mesa a cesión gratuíta desta parcela por moito que vostedes teñan iniciado calquera tipo de procedemento xudicial. En calquera caso o procedemento que vostedes iniciaron pronunciárase sobre o acontecido naquel pleno, sobre se estivo ben ou mal feito ou houbo algún tipo de problema na decisión adoptada, mais que na decisión, na cuestión da orde do día, pero iso non pode hipotecar nin paralizar a posibilidade de que cedamos gratuitamente unha parcela a favor da Xunta de Galicia para un edificio

destinado á terceira idade, especialmente nun momento coma o actual no que dentro de pouco vanse plasmar nos orzamentos da Xunta de Galicia os compromisos de execución de equipamentos. En todo caso, o procedemento que iniciaron, que probablemente admita recurso se algunha das dúas partes non está de acordo, é unha cuestión que se pode alongar moito no tempo, e non pode ter nada que ver con que o concello continúe cos seus plans, o litixio non é respecto da parcela, o litixio tenta demostrar que o que se levou a pleno como unha posta a disposición vulneraba os dereitos duns concelleiros. A Xunta de Galicia ten que responder a petición do noso concello, a parcela reúne todos os requisitos, non ten o mais mínimo problema para ser cedida e polo tanto non vale que quede sobre a mesa porque haxa unha discusión sobre un procedemento que para nada invalida a esta parcela.

Intervén, a petición da presidencia, e para clarificar o procedemento a seguir neste caso, a secretaria xeral do concello dona **Rosa Ana Prada Queipo**, que di que neste caso vostedes poden debater o asunto, pero antes de entrar a votar o contido, se votaría a proposta do grupo municipal popular de que quede enriba da mesa.

Toma a palabra o señor alcalde don **Carlos Antonio Fernández Castro** introduce o asunto dando lectura á proposta da Alcaldía sobre este asunto:

O Concello de Ames é titular dunha parcela de 3.452 m² situada no sector urbanístico do S-15 (Travesía do Porto Sur), no núcleo do Milladoiro. Por acordo plenario desta corporación de data 25 de febreiro de 2010, iniciouse un expediente para poñer dita parcela a disposición da Xunta de Galicia para a construción dun edificio destinado á terceira idade.

O concello de Ames ten a necesidade de dotarse dun centro específico para a terceira idade, un cando menos, a poder ser deberíamos dotarnos de dous. A pesar de que sempre se destacan, como datos peculiares da poboación de Ames, o número de nenos/as e de mozos/as, a media de idade que ronda os 36 anos, etc, non podemos nin debemos esquecer que na franxa de idade de maiores de 60 anos, temos actualmente mais de 4.064 persoas censadas, segundo os datos facilitados polo padrón municipal.

Así mesmo, estamos vendo todos os días nos medios de comunicación que a Administración Autonómica, concretamente a Consellería de Traballo e Benestar, vai adquirindo novos compromisos de execución de centros de día, residencias, ou outros proxectos destinados aos maiores, noutros municipios que en moitos casos teñen unha poboación moi inferior á do noso concello.

Ante esta situación, nós debemos adoptar unha postura activa e proactiva, polo que dende esta Alcaldía se teñen realizado múltiples consultas, contactos e conversas con distintos responsables deste área da Administración Autonómica, expoñendo esta necesidade obxectiva e explicando que nós poderíamos ofrecer a parcela adecuada para elo, pedindo así un compromiso firme en tal sentido.

É por elo que en febreiro de 2010, propuxen ao pleno desta corporación o “Inicio do expediente para a cesión gratuíta de parcela na localidade do Milladoiro a favor da Xunta de Galicia para edificio destinado á terceira idade”, coa finalidade de que a Consellería correspondente tivera encima da mesa unha parcela concreta ofrecida polo concello de Ames, aproveitando a boa dispoñibilidade amosada nas conversas mantidas coa Administración Autonómica e lograr facer máis firme e sólida a candidatura de Ames ante as múltiples peticións que poden chegar á Xunta de Galicia.

Ante as dificultades apreciadas antes daquel pleno a celebrar o 25 de febreiro, para obter a maioría necesaria para iniciar o expediente de cesión gratuíta desta parcela á Xunta de Galicia, esta Alcaldía optou por modificar o rango da proposta cambiando a inicial “cesión gratuíta” por unha “posta a disposición” que, aínda que fose de menor rango, deixase adoptado o acordo de que o Concello de Ames estaba moi interesado

en dotar ao noso municipio deste equipamento, aínda que posteriormente fose preciso adoptar un novo acordo de “cesión gratuíta”.

Así pois, producido dito acordo plenario de Inicio de expediente para a posta a disposición desta parcela no Milladoiro, este foi comunicado á Xunta de Galicia para que, cando menos con ese carácter de posta a disposición, se tivera en conta ao concello de Ames como firme candidato a obter este equipamento.

Tal ofrecemento municipal foi reiterado de forma oficial á conselleira de Traballo e Benestar, así como ao xerente do Consorcio Galego de Servizos de Igualdade e Benestar, con motivo da súa visita a Ames o pasado 31 de maio, no transcurso do acto institucional de visita e inauguración da nova Escola Infantil Figueiras no Milladoiro. A esta solicitude comprometeuse a conselleira a estudar o asunto, ao carecer Ames de infraestruturas para a terceira idade.

Posteriormente, recibíuse neste concello a visita dun arquitecto pertencente a unha asistencia técnica que traballa para esa Consellería, o cal se entrevistara tanto co alcalde como coa arquitecta municipal, co obxectivo de recabar toda a información referida ás parcelas previstas para a construción da nova escola infantil de Bertamiráns e para este centro de día ou edificio para a terceira idade no Milladoiro. Este arquitecto, despois de realizada a correspondente visita, manifestou verbalmente a idoneidade de ambas parcelas para a finalidade proposta e que así o faría chegar á Consellería e ao Consorcio no seu informe.

Á vista de todo o exposto e, primeiro: ante a receptividade da Xunta de Galicia, segundo: ante a predisposición do concello na cesión da súa parcela para albergar este proxecto, terceiro: ante a información favorable do técnico responsable de valorar as parcelas, cuarto: dado que a parcela prevista no sector urbanístico do S-15 para este proxecto é de total dispoñibilidade neste momento, quinto: que a Xunta de Galicia elabora no mes de setembro os seus orzamentos para o ano que ven. Por todos estes motivos non debemos deixar pasar a oportunidade de “puxar” por obter o compromiso firme da Xunta de Galicia, que se explicita do xeito máis firme se acadamos a inclusión deste obxectivo nos orzamentos para o exercicio 2011.

Tras a lectura da proposta continúa dicindo que o que se propón hoxe ao pleno da corporación, xa non con carácter de posta a disposición, que era unha fase inicial, é a adopción do acordo para poder obter un compromiso firme da Xunta de Galicia e que se explicita nos seus orzamentos para o ano 2011. Reitera que non considera oportuno nin coherente que por culpa da actuación xudicial iniciada polo PP teña que quedar pendente o poder optar en serio por parte do concello de Ames a un edificio de equipamento para a terceira idade. Remata dicindo que o goberno mantén a súa proposta por crer que non hai ningún obstáculo, e, en todo caso, xa se substanciará en sede xudicial a demanda do PP.

Seguidamente o señor alcalde inicia unha primeira quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, que substancialmente indica que como xa se expuxo, no pleno de 25 de febreiro se acordou o inicio deste expediente e posteriormente no pleno de maio, se volveu tratar o tema como consecuencia dunha moción de urxencia do seu grupo municipal, que aprobouse por unanimidade, de adoptar acordo de demandar á Xunta de Galicia un centro da terceira idade para Ames localizado no Milladoiro. A vontade política da corporación municipal desta demanda está, por tanto, claramente expresada. Indica que lle parece curioso o parágrafo da proposta da Alcaldía “Ante as dificultades apreciadas antes daquel pleno a celebrar o 25 de febreiro para obter a maioría necesaria para iniciar o expediente de cesión gratuíta desta parcela á Xunta de Galicia a Alcaldía optou por modificar o rango da proposta (...)”, foi unha equivocación, xa que se o alcalde tivera consultado co BNG no mes de febreiro, este grupo tería aprobado a proposta pois así o tiña acordado, sendo a consecuencia o terse perdido varios meses. Continúa que no punto da parcela destinada a escola infantil, non lle parecía ao BNG a idónea e tiña decidido absterse. Hoxe o BNG non

vai apoiar a proposta do grupo municipal popular de que quede sobre a mesa este asunto pois prioriza o avance na consecución deste equipamento social tan necesario para os maiores de Ames. Certo é que o BNG censurou daquela, e o volve reiterar agora, a modificación feita na orde do día, pensando que foi unha actuación irregular e que vulnerou os dereitos dos concelleiros, pero neste momento non consideran tan importante esta cuestión como dar pasos na consecución do equipamento, e manifesta ter dúbidas de que o goberno autonómico teña tanta vontade como a corporación de Ames, remitíndose ás probas, presentes nos medios, de que centros destas características levan meses paralizados en toda Galicia.

Que non se debe confundir aos cidadáns facéndolles crer que a posta a disposición, decisión fundamentalmente de ámbito político, é o mesmo que a desafectación ou a cesión gratuíta, decisións de carácter xurídico-administrativo. Da lectura ao parágrafo do informe de secretaría referente a que a Xunta de Galicia “pretende construír” no núcleo do Milladoiro un edificio destinado á terceira idade, e di que non hai constancia formal, documental, supoñendo que se tratará dunha información oral que ten o grupo de goberno, indicando que o BNG non vai ser puntilloso tratándose de conseguir un equipamento tan necesario e supoñendo que non é conditio sine qua non a existencia de petición formal por parte da Xunta de Galicia. Quere deixar manifesto, non obstante, que a ninguén debe sorprender que teñan dúbidas, pois parece que ás veces se cambia de criterio sobre os mesmos temas dun pleno ao outro, pois, non sendo puntillosos, os membros do BNG non se teñen por ilusos nin desinformados, xa que cando no pleno de febreiro se cambiou de cesión gratuíta para posta a disposición no caso da escola infantil, cuxo trámite é o mesmo que o do centro da terceira idade, argumentábase a inexistencia formal de solicitude por parte da Xunta de Galicia para cambiar o título, polo tanto cambiando escola infantil por centro de día se está agora na mesma situación. O BNG vai votar a favor desta aprobación, pero que ás veces o partidismo extrema as cousas en asuntos que poderían terse solucionado por unanimidade ou polo menos con maioría absoluta, como tería ocorrido no pleno do mes de febreiro se se tivera falado co BNG.

Intervén o voceiro do grupo municipal popular don **Santiago Amor Barreiro**, que dirixíndose ao señor alcalde dille que o goberno municipal xa fixo unha proposta á Xunta de Galicia unha vez que se adoptou o acordo de posta a disposición, entendendo o PP que se a Xunta de Galicia inicia a elaboración dos orzamentos no mes de setembro non lembran que en orzamentos anteriores figurasen partidas concretas para centros destinados á terceira idade, si unhas partidas específicas na sociedade que era o Consorcio Galego.

O grupo municipal popular si cre que este asunto interfere co adoptado no pleno de febreiro, porque os puntos levados a comisión informativa e pleno en febreiro son os mesmos. O fiscal se pronuncia sobre o acontecido en febreiro, e de seguido da lectura do informe: *“El hecho base de la vulneración se centra en la modificación de los puntos quinto y sexto del orden del día del pleno del ayuntamiento de Ames convocado para el día 25 de febrero de 2010, apartándose de lo tratado en la comisión informativa previa al pleno. La cuestión sometida a la comisión informativa fue la cesión gratuíta de dos parcelas a la Xunta de Galicia para una escuela de educación infantil y para una residencia de la tercera edad. La modificación consistió en substituír la citada cesión gratuíta por puesta a disposición, ocultando a los recurrentes las consecuencias respecto a las mayorías necesarias para aprobar dichos puntos. En definitiva, si para los recurrentes la fraudulenta modificación no podría ser aprobada la cuestión sometida al pleno. Para analizar la cuestión a la luz del derecho fundamental alegado decidir si estamos ante una cuestión de vulneración del derecho fundamental a participar en asuntos públicos del artículo 23 nº 1 y 2 de la Constitución Española, o por el contrario, ante una cuestión de mera legalidad ordinaria, por lo que al caso respecta conviene recordar el núcleo básico del derecho fundamental a la*

participación política inherente al cargo de concejal, es por un lado su derecho a la información y a desarrollar sus funciones sin impedimentos legítimos para que pueda ejercer sus facultades y poder controlar la gestión municipal, y en el caso que nos ocupa, poder utilizar la información y el asesoramiento necesario antes del pleno, esto se quebró con el injustificado e infundado cambio de la Alcaldía produciendo unha situación de desventaja para el grupo de la oposición. El cambio afectó y potencialmente pudo desvirtuar la previa comisión de información generando la desinformación del grupo de la oposición o cuando menos una situación de precariedad incompatible con el derecho fundamental de participación política de los concejales demandantes”

Remata dicindo que seguen mantendo que os puntos están relacionados e por tanto manteñen a postura de deixar enriba da mesa esta asunto ate que haxa unha resolución xudicial.

Toma a palabra o señor alcalde don **Carlos Antonio Fernández Castro**, que dirixíndose ao señor Amor dille que acaba de dar lectura a un documento moi parcial e lle pregunta se coñece o procedemento xudicial porque nel hai unha demanda que presenta o seu letrado, logo hai un escrito de contestación do avogado da outra parte. Logo hai unha intervención do fiscal, que é unha intervención mais, por moito que sexa o ministerio público, que fai unha lectura dos acontecementos e emite o seu informe. Finalmente, despois de outros pasos que hai que dar, haberá un fallo xudicial.

O válido será o fallo xudicial en última instancia, e aínda no caso de que houbera algún pronunciamento a parcela non está afectada polo procedemento, pois nese caso o fiscal diría que se paralizase.

O concello é propietario da parcela e pode dispoñer dela, sendo o primeiro trámite, de aprobarse este punto, a desafectación da mesma, trámite administrativo que convén facer en calquera caso. En caso de acordarse hoxe a cesión gratuíta non terá mais efecto que facer a manifestación expresa da demanda á Xunta de Galicia para que cumpra a súa parte, pedíndolle ao grupo municipal popular que non faga de escudo protector tentando evitar que hoxe o pleno tome unha decisión que aboque ao goberno autonómico a ter que dar unha necesaria resposta. O acordo de cesión gratuíta non é irreversible, non supón a perda da titularidade municipal en canto non se asine a escritura pública de transmisión, isto só é un envite ao goberno da Xunta de Galicia, e, unha vez mais, o PP de Ames tenta impedir ao pleno do concello que lance un reto ao goberno autonómico. Pide reflexión ao PP, xa que no pleno pasado presentaron unha moción e, por cabezonería, foi aprobada polos outros grupos e por eles non. Remata dicindo que o PP de Ames non sexa un obstáculo e non se poña en defensa partidista do goberno da Xunta de Galicia, pois o que deberían de facer é o contrario, convencer á consellería para que se faga o equipamento e así poder dicir que grazas á súa mediación se moveu a balanza en sentido favorable.

A continuación o señor alcalde abre unha segunda quenda de intervencións outorgando a palabra ao voceiro do grupo municipal do BNG don **Xosé Manuel Fernández López**, que substancialmente di que se o grupo municipal do BNG se puxese nunha posición claramente partidista estaría encantado de que o PP votase en contra deste asunto, pois o titular da prensa sería que socialistas e nacionalistas apoian a cesión de parcela para centro de día e o PP non. Di estar convencido de que o PP de Ames tamén quere este equipamento para o Milladoiro, polo que se pregunta cal é a diferenza no substancial. O BNG xa censurou politicamente a actitude da Alcaldía no cambio do enunciado da orde do día do pleno de febreiro, se o PP tamén quere censurala xuridicamente que o faga, pero no que atinxe a este equipamento público e social para o Milladoiro que non se poña o PP de parapeto da Xunta de Galicia baseándose en matices.

Intervén o voceiro do grupo municipal popular don **Santiago Amor Barreiro**, que substancialmente indica que o seu grupo non actúa de parapeto da Xunta de Galicia, o que fai é manterse en que este asunto está relacionado co pleno do mes de febreiro, e dirixíndose ao voceiro do grupo municipal do BNG dille que nese pleno se vulneraron os dereitos fundamentais da oposición, dos dous grupos. Continúa dicindo que o PP xa manifestou que está a favor do centro da terceira idade e considera que Ames xa o debería ter dende hai tempo e o demostrou cando apoiou a moción do BNG. Dirixíndose ao señor alcalde dille que o que pretende ao someter isto ao pleno da corporación é tentar que non haxa unha sentenza contraditoria, porque probablemente vaia remitir ao xulgado o acordo deste pleno para que archive a causa e quede sen efecto a demanda presentada polo PP. Di non entender como se pode levar adiante un asunto cuxo expediente non contén ningún documento de petición formal por parte da Xunta de Galicia, e manifesta ademais que este ámbito do plan parcial está afectado por un procedemento xudicial en fase de recurso de casación ante o Tribunal Supremo, e que o PP ten dúbidas en canto o que poida afectar o cambio de lexislación, o cal dixeron na comisión informativa aínda que na acta figurara outra cousa, pois non pedían o que se lles entregou, pedían que se lles informara da situación da parcela antes de que houbera unha sentenza. Dende febreiro non mudou nada en canto a resolver as dúbidas, mesmo aumentaron, e dille ao señor alcalde que se lle esqueceu un punto na súa memoria ou proposta, dicir que se cede esta parcela porque ao alcalde lle interesa aínda que non haxa compromiso documentado da Xunta de Galicia, porque non foi quen de xestionar nos últimos anos un centro de día para Ames, lembrando que no ano 2006 o concello renunciou a unha subvención para este fin da Deputación da Coruña, e no 2007 participou de novo presentando un orzamento noutra convocatoria da que non se soubo mais. O grupo municipal popular considera que as necesidades hai que negociarlas co goberno autonómico, presentar un plan de necesidades, onde o PP de Ames estará apoiando, e non pedir dotacións sen mais. Remata dirixíndose ao señor Fernández López para dicirlle que por esperar un mes non pasaría nada, pero que cada un sabe o lugar que ocupa neste pleno.

Toma a palabra o señor alcalde don **Carlos Antonio Fernández Castro** para dicir substancialmente que a intervención do señor Amor foi pobre en argumentacións e de moi baixo nivel, sacando a colación un rebumbio de todo o que se lle ocorre e descualificando mesmo a quen fixo de secretaria accidental na comisión informativa dicindo que non se recolleu ben a súa intervención na acta, incluso como se iso tamén fora competencia da Alcaldía. Continúa dicíndolle que xa se lle entregou un informe conxunto de secretaria e urbanismo de como podía afectar a modificación última da LOUGA a esta parcela do sector S15, se quería outra cousa debería telo explicitado. Continúa que en relación ao citado recurso de casación foi presentado polo concello e aprobado en pleno, pero de momento toca agardar, e como hai un interese público moi importante polo medio o goberno municipal goberna, e na modificación da LOUGA, aprobada no Parlamento de Galicia cos votos favorables exclusivamente do grupo popular e por tanto non sospeitoso de estar o PSOE movendo nada, incorporou unha disposición transitoria 1ª que abre o camiño para resolver o posible conflito do sector S15 aínda no hipotético caso de que o fallo fose negativo.

Rematadas as intervencións sométese a votación a proposta do grupo municipal popular de deixar sobre a mesa o punto sexto da orde do día: cesión gratuíta de parcela na localidade do Milladoiro a favor da Xunta de Galicia para edificio destinado á terceira idade, sendo rexeitada por 12 votos en contra (os 8 dos membros presentes do grupo municipal socialista e os 4 dos membros presentes do grupo municipal do BNG) e os 6 votos a favor dos membros presentes do grupo municipal popular.

Rematadas as intervencións o pleno da corporación por maioría absoluta, cos votos a favor dos 8 membros presentes do grupo municipal socialista e dos 4 membros presentes do grupo municipal do BNG e a abstención dos 6 membros presentes do grupo municipal popular, adopta os seguintes acordos:

Primeiro.- Prestar aprobación á cesión gratuita de parcela na localidade do Milladoiro a favor da Xunta de Galicia para edificio destinado á terceira idade, previa tramitación do expediente de desafectación a que fai referencia o artigo 8 do Regulamento de Bens das Entidades Locais, aprobado por Real Decreto 1372/86 de 13 de xuño.

A parcela que se desafecta se identifica como parcela Dp 1 do sector S15 Travesía do Porto Sur, de 3.452 m², inscrita no Rexistro da Propiedade de Negreira Tomo 1387, Libro 529, Folio 91, Alta 1, Finca 34487.

Segundo.- Expoñer o expediente de desafectación polo prazo de 1 mes, mediante anuncio no BOP, Taboleiro de anuncios do concello e Páxina Web municipal.

Terceiro.- Facultar ao señor alcalde presidente Carlos Antonio Fernández Castro para cantas actuacións de trámite sexan precisas para a mellor execución do acordado.

O señor alcalde outorga a palabra á señora secretaria do concello, que a pedira con anterioridade ao fío dunha intervención do señor Fernández López na que facía referencia ao expediente de cesión e desafectación, precisando dona **Rosa Ana Prada Queipo** que primeiramente hai que desafectala, e para facelo teñen que concorrer razóns de legalidade e oportunidade. Sendo a Xunta de Galicia unha administración pública e sendo o fin de interese público, concorren os requisitos de legalidade e oportunidade da desafectación. Unha vez conformado o expediente de desafectación se entraría na segunda fase, a cesión formal.

O señor alcalde outorga a palabra ao voceiro do grupo municipal popular don **Santiago Amor Barreiro** para facer unha explicación de voto, o cal di que que a abstención do seu grupo foi motivada pola razón de non substituír a demanda presentada no seu momento, á espera dunha resolución xudicial, pero que lles tivera gustado votar a favor e que o acordo fora tomado por unanimidade, pois desexan que o Milladoiro teña un centro para a terceira idade, sendo contestado polo señor alcalde don **Carlos Antonio Fernández Castro** que en política os desexos se manifestan votando, e, se o desexaban, puideron votar a favor unha vez que perderon a proposta de deixar o punto sobre a mesa.

Punto Sétimo.- Toma de coñecemento polo Pleno da renuncia do concelleiro don David Santomil Mosquera.

Informa o señor alcalde que o señor Santomil presentou con data 17 de agosto de 2010 no rexistro do concello un escrito no que comunica á corporación municipal de Ames a súa renuncia como concelleiro por motivos persoais que lle impiden atender as obrigas propias do cargo coa dedicación que tal responsabilidade comporta.

Intervén o concelleiro do grupo municipal do BNG don **David Santomil Mosquera** que di: Basicamente quero despedirme da corporación e dicir que foi un auténtico pracer estar aquí. Nos veremos no concello, nos veremos no día a día, seguirei vinculado ao BNG de Ames coma sempre, no nivel organizativo. Como xa comentei con algúns dos compañeiros a miña renuncia débese a circunstancias persoais e profesionais que me impiden cumprir as responsabilidades propias de concelleiro. Hoxe tamén é a miña intención, refrendada polo consello local e os compañeiros do grupo municipal, pasarlle o relevo ao compañeiro e amigo Moncho Arufe, que ademais hoxe xa está presente e llo agradezo, e que segundo o previsto se incorporará en setembro. Pola miña banda agradezo sobre todo o bo trato recibido tanto polo grupo municipal popular coma polo grupo municipal socialista e os traballadores do concello, e por suposto polos meus compañeiros e amigos de grupo

municipal, tanto no persoal coma no profesional. Aquí tendes un amigo para o que queirades. Moitas grazas.

Toma a palabra o señor alcalde don **Carlos Antonio Fernández Castro** para dicirlle ao señor Santomil: Moitas grazas a vostede, o aprecio é mutuo, foron uns anos de traballo intenso, coincidente unhas veces e discrepante outras, pero sempre dentro dos canles democráticos e de bo compañeirismo e bo entendemento. Como é lóxico lamentamos esta dimisión, perdemos a un membro da corporación pero respectamos esta decisión de carácter persoal.

Continúa dicindo que o pleno debe tomar coñecemento desta renuncia, dando lectura a continuación aos puntos segundo e terceiro do informe de secretaría.

Reitera o agradecemento ao señor Santomil polo traballo desenvolvido, e dille que, facéndose eco das súas propias palabras, aquí deixa un montón de amigos e amigas que sen lugar a dúbidas o serán por moito tempo.

Intervén o voceiro do grupo municipal popular don **Santiago Amor Barreiro**, que dirixíndose ao señor Santomil dille desexarlle éxitos nas súas etapas laboral e familiar. Deixas un bo poso, na miña persoa e creo que podo falar tamén en representación do grupo municipal popular, é unha pena que deixes esta corporación, pois as túas intervencións se notaron.

Intervén o voceiro do grupo municipal do BNG don **Xosé Manuel Fernández López**, que di que aínda que trata a diario co señor Santomil nos órganos do BNG quere facer unha pequena intervención para agradecerlle o traballo en nome do grupo municipal e do colectivo do BNG. Dirixíndose a el dille que do traballo que fixeches durante estes tres anos agardamos que a experiencia fose positiva, que aprendeses moito con toda esta corporación municipal, e como di Santiago Amor, tamén desexarche os mellores éxitos nese labor académico profesional, e sobre todo, nese labor familiar e persoal que tes por diante e que sabemos que afrontas con moita ilusión.

Finalizadas as intervencións o pleno da corporación toma coñecemento da renuncia ao cargo de concelleiro de don David Santomil Mosquera presentada por escrito mediante rexistro de entrada e que non ofrece dúbidas da súa autenticidade.

Tomado coñecemento da renuncia o pleno acorda solicitar a expedición de credencial a favor do seguinte candidato da lista na que se produciu a vacante, Bloque Nacionalista Galego (BNG), que resulta ser don **José Ramón Arufe Vidal**, o cal terá dereito a tomar posesión no primeiro pleno que se celebre unha vez recibida a credencial.

C) PARA CONTROL DO GOBERNO:

Punto Oitavo.- Mocións.

Informa o señor alcalde que hai dúas mocións presentadas polo grupo municipal popular incorporadas na orde do día, que son as que quedaran pendentes de votación e debate no pleno ordinario de xuño, celebrado o 1 de xullo.

a. Moción do grupo municipal popular para a remisión ó pleno do concello de Ames con periodicidade trimestral por parte do departamento de intervención dun informe do estado de execución do orzamento e dos movementos de tesouraría por operacións orzamentarias independentes e auxiliares do orzamento e da súa situación.

Intervén o voceiro do grupo municipal popular don **Santiago Amor Barreiro** para dicir: Esta moción estaba xa debatida e pola miña parte podemos pasar xa á

votación, unicamente, como isto se retrasou porque veu ao pleno do mes de xuño e despois non se incorporou na orde do día do mes de xullo, preguntarlle á intervención municipal se hai algún impedimento ou problema para que esta información sexa introducida no pleno ordinario que imos celebrar no mes de outubro.

A señor interventora do concello dona **María del Carmen Castro Louzao** di que non hai ningún problema en cumprir o solicitado.

Rematadas as intervencións o pleno da corporación por unanimidade dos seus membros presentes presta aprobación á moción do grupo municipal popular.

O texto da moción aprobada é do teor literal seguinte:

EXPOSICIÓN DE MOTIVOS

Nesta actual lexislatura 2007-2011, dentro dos incalculables atrancos que padecemos por parte do goberno municipal do PSOE, compre destacar un de gran relevancia: a escasa ou nula colaboración que existe á hora de facer chegar toda a información que solicita o grupo municipal do PP.

O artigo 23.1 da Constitución Española establece como dereito fundamental da persoa o poder participar nos asuntos públicos por medio de representantes, elixidos a través dos partidos políticos, tal e como establece o artigo 6 da CE.

Para o exercicio desta participación, requírese ter o oportuno coñecemento dos asuntos a tratar ou tratados por cada un dos organismos representativos, e este coñecemento obtense mediante o acceso aos datos e informacións que obran nos mesmos.

O artigo 77 da Lei 7/1985, de 2 de abril, Reguladora das Bases do Réxime Local, recoñece o dereito dos concelleiros, a obter do alcalde ou da Comisión de Goberno, cantos antecedentes, datos e informacións, obren en poder dos servizos da Corporación, e resulten precisos para o desenvolvemento da súa función, ratificándose esta mesma posibilidade nos artigos 14.15 e 16 do Real Decreto 2568/1986, de 28 de novembro, Regulamento de Organización, Funcionamento e Réxime Xurídico das Entidades Locais.

No artigo 22.2 b) LRBRL confírese ao Pleno a atribución do control e fiscalización dos órganos de goberno, entre as que están a determinación dos recursos propios de carácter tributario, a aprobación e modificación dos Orzamentos, a disposición de gastos en materia da súa competencia e a aprobación das contas, todo elo de acordo co disposto na Lei de Facendas Locais.

Neste Real Decreto lexislativo 2/2004, de 5 de marzo, polo que se aproba o texto refundido da Lei reguladora das Facendas Locais, no seu Capítulo III-De la contabilidad, artigo 207 información periódica para el Pleno de la corporación, dise: "La Intervención de la entidad local remitirá al Pleno de la entidad, por conducto de la presidencia, información de la ejecución de los presupuestos y del movimiento de la tesorería por operaciones presupuestarias independientes y auxiliares del presupuesto y de su situación, en los plazos y con la periodicidad que el Pleno establezca".

Polo tanto, o Grupo Municipal Popular fai a seguinte

PROPOSTA DE ACORDO PLENARIO

1.- Que os servizos económicos do Concello remitan trimestralmente información da execución dos orzamentos e dos movementos de tesouraría por operacións orzamentarias independentes e auxiliares ao orzamento e da súa situación.

2.- Que esta información se realice nos plenos ordinarios que se celebren os meses de abril, xullo, outubro e xaneiro de cada ano.

3.- Que no vindeiro pleno ordinario do mes de outubro de 2010 se dea esta información referida ao último semestre do ano 2009 e do 1º semestre do 2010.

b. Moción do grupo municipal popular para a mellora da seguridade viaria no Lugar de Lombao, parroquia de Ames.

Intervén a concelleira do grupo municipal popular dona **María Dolores Fernández Álvarez** para dicir: Esta moción xa se trouxo ao pleno do 1 de xullo, pero debido a que finalizou dunha maneira inapropiada non se chegou a debater. Teño que dicir que no mes de xullo de 2009 o compañeiro Bernardo Moar tamén fixera un rogo no sentido desta mesma moción. Paso a darlle lectura sendo o seu teor literal o seguinte:

EXPOSICIÓN DE MOTIVOS

Na estrada AC-453, no Lugar de Lombao, no punto coñecido como Cruce do Lombao e súas proximidades, existe unha elevada accidentalidade e presenza recorrente de conflitos entre vehículos e peóns. Ademais no devandito punto concorren as paradas de transporte escolar que recollen ao alumnado desde 3 anos en adiante e a parada do autobús de liña. A estrada AC-453, cuxa titularidade a ten a Xunta de Galicia, é unha travesía semiurbán dotada de beirarrúas, cun carril por cada sentido de circulación, correctamente iluminada e cunha velocidade limitada a 50km/h, a un e outro lado do cruce.

Polo tanto, o Grupo Municipal Popular fai a seguinte

PROPOSTA DE ACORDO PLENARIO

1.-Instar á Xunta de Galicia á inclusión dun paso de peóns e todas as melloras necesarias en canto á sinalización vertical e horizontal, así como poñer as medidas que se consideren necesarias có fin de mellorar a seguridade viaria da zona.

Continúa dicindo a concelleira que os veciños desta zona se merecen esta mellora viaria.

Toma a palabra o señor alcalde don **Carlos Antonio Fernández Castro** para dicir: Moitas grazas pola súa presentación. Sendo xa as doce da noite deste caloroso xoves de finais de agosto e esgotado un tempo mais que razoable para unha sesión plenaria, esta Alcaldía levanta a sesión.

Chegadas as vinte e catro horas o señor alcalde presidente dou por rematado o acto e levantou a sesión do día 26 de agosto de 2010, de todo o que eu como secretaria certifico.

Vº Prace

A secretaria

O alcalde